

# III

NOVA IZDANJA //  
NEWLY PUBLISHED

**Selma ISIĆ**

*Arhiv Tuzlanskog kantona*

selmaisic@yahoo.com

UDK/UDC: 93/94:016:015(497.6)"1961/2020" Bedaković A. Gušić S. (01)


**Amela Bedaković, Sejdalija Gušić, BIBLIOGRAFIJA  
ČASOPISA "GLASNIK ARHIVÂ I ARHIVISTIČKOG  
UDRUŽENJA BOSNE I HERCEGOVINE" (1961-2020),  
Arhivističko udruženje u Federaciji Bosne i Hercegovine,  
Sarajevo 2022, 228 str.**

Publikacija *Bibliografija časopisa Glasnik arhivâ i Arhivističkog udruženja Bosne i Hercegovine (1961-2020)* štampana je 2022. godine u izdanju Arhivističkog udruženja u Federaciji Bosne i Hercegovine na 228 strana.

Po riječima samih autora *Bibliografija* je posvećena kolegici Mileni Gašić, koja je bila idejni pokretač projekta.

Sadržaj časopisa *Glasnik arhivâ i Arhivističkog udruženja Bosne i Hercegovine*: I Predgovor - Preface, II Uvodne napomene, III Kratak pregled članova redakcija i glavnih i odgovornih urednika, te broja radova po poglavljima, IV Pregled izdanja *Glasnika* po godinama, V Registar autora, VI Iz recenzija.

Publikacija je započeta sa *Predgovorom* u kojem su autori dali nekoliko osnovnih informacija o izdavaču, kao i osnovne ciljeve i zadatke istog. Pored toga naglasili su da u projektu Bibliografije „sublimirali su ono što je već ranije urađeno, a objavljeno u radovima Gaković Ljiljana: *Pregled sadržaja „Glasnika“ od broja I/1961- XVIII-XiX/1978-79. – 1980-1981, sv. 20-21, str. 335-353, Srndović Suzana: Bibliografija radova objavljenih u Glasniku arhivâ i DAR BiH“(I/1961*



– XXV/1985). – 1985, sv. 25, str. 361-404, i Šapčanin Adnana: *Bibliografija „Glasnika arhivâ i Društva arhivskih radnika Bosne i Hercegovine“*, objavljeno u *Glasnik arhivâ i Društva arhivskih radnika Bosne i Hercegovine* – ISSN 0436-046X- br. 33, 1944-1945, str. 191-252“:<sup>1</sup> Autori su dali predgovor i na engleskom jeziku.

U poglavlju *Uvodne napomene* predstavljeno je Društvo arhivskih radnika Bosne i Hercegovine, njegov nastanak i promjene naziva, sve do 2003. godine od kada isto nosi naziv Arhivističko udruženje Bosne i Hercegovine. U okviru ovog poglavlja posebno je istaknut značaj pokretanja časopisa *Glasnik*, koje je kao i samo Udruženje od svog pokretanja, nekoliko puta mjenjalo naziv: *Glasnik arhiva i Društva arhivista Bosne i Hercegovine* br. 1, god. 1961 – br. 3, god. 1963; *Glasnik arhiva i Društva arhivskih radnika Bosne i Hercegovine* br. 4-5, god. 1964-1965. – br. 36, god. 2000-2001. (2004); *Glasnik arhiva i Arhivističkog udruženja Bosne i Hercegovine* br. 37-38, god. 2002-2003 (2007) – br. 49-50, god. 2019-2020 (2021).<sup>2</sup> Istaknuti su i razlozi i ciljevi pokretanja časopisa koji se ogledaju u želji „da se proširi osnova diskusije o svim ovim osnovnim pitanjima naše arhivistike, da se sa zadacima, teškoćama i uspjesima službe upozna što širi krug zainteresovanih faktora, zatim, sa težnjom da se našoj javnosti stave na uvid rezultati rada naših arhivskih ustanova i pojedinih arhivskih radnika, i, najzad, da se našim naučnim radnicima na polju istorijske nauke pruži još jedna mogućnost više za objavljivanje radova pisanih na osnovu građe deponovane u arhivima Bosne i Hercegovine“.<sup>3</sup>

U nastavku autori su predstavili rubrike časopisa i reference, dajući na taj način naziv pojedine rubrike i numeričku oznaku koliko je priloga predstavljeno u okviru svake rubrike.<sup>4</sup> Po podacima autora u Bibliografiji je predstavljeno 1.293 bibliografske jedinice, po rubrikama: Arhivistika i arhivska služba - 514; Članci i rasprave – Iz drugih časopisa – 144; Građa – Iz građe 132; Prikazi i ocjene – Prikazi – 302; Društvene vijesti – Vijesti – Iz društva – 131; Bibliografija-12; Razmjena publikacija – 8; In memoriam – 33; Inventari – 17. Svaka rubrika je dodatno pojašnjena i date su neke osnovne informacije o istim.

Treće poglavlje publikacije je *Kratak pregled članova redakcija i glavnih i odgovornih urednika, te broja radova po poglavljima*, u kome su po samom naslovu date informacije o svakom broju časopisa ponaosob sa podacima o redakcijama, broju objavljenih radova po rubrikama sa tačnom naznakom koliko je radova u okviru pojedine rubrike, sa brojem autora. Za svaki broj

<sup>1</sup> Amela Bedaković, Sejdalija Gušić, *Bibliografija časopisa Glasnik Arhivâ i Arhivističkog udruženja Bosne i Hercegovine“ 1961-2020*, Sarajevo 2022, 8.

<sup>2</sup> *Isto*, 12.

<sup>3</sup> *Isto*, 11. Autori preuzeli iz: Riječ Redakcije, *Glasnik arhiva i Društva arhivista Bosne i Hercegovine*, br. 1, Sarajevo 1961, 7.

<sup>4</sup> Primjer Arhivistika i arhivska služba (1-514); Članci i rasprave – Iz drugih časopisa (515-658) – što bi značilo da je u dosadašnjih 50 brojeva časopisa objavljeno 514 priloga u navedenoj rubrici. Na taj način dati su podaci o broju o broju objavljenih priloga u okviru jedne rubrike, ali i tačna brojka svake bibliografske jedinice objavljene u okviru jedne rubrike.

navedeni su i članovi Redakcije. Po ovim podacima vidljivo je da je u 60 godina publikovanja *Glasnika* objavljeno 50 brojeva časopisa u 39 knjiga, od čega je 11 dvobrojeva. Po datim podacima utvrđeno je da je časopis broj XXXII (1992-1993) imao najmanje objavljenih priloga, samo 17, dok je najviše objavljenih priloga, njih 49, publikovano u dvobroju XXXVII-XXXVIII (2002-2003) objavljenom 2007. godine. U istom broju je objavljen i najveći broj stručnih radova, 32 u rubrici „Arhivistika i arhivska služba“. Isti su izlagani na savjetovanjima arhivskih radnika Bosne i Hercegovine na Vlašiću 2004. i u Laktašima 2005. godine. Najmanji broj stručnih radova objavljen je u dvobroju XVI-XVII (1976-1977) samo tri. Pored navedenih, u ovoj rubrici autori daju još mnogo podataka koji mogu poslužiti za razna poređenja i analize koje se odnose na časopis *Glasnik*.

Četvrto poglavlje publikacije *Bibliografija časopisa Glasnik arhivâ i Arhivističkog udruženja Bosne i Hercegovine* je glavno poglavlje, a nosi naziv *Pregled izdanja Glasnika po godinama*. U njemu su dati pregledni podaci o broju časopisa, godini izdanja i štampe, te broju stranica za svaki broj časopisa, kao i glavnog i odgovornog urednika za svaki broj. Iz navedenog se vidi koji brojevi časopisa su štampani kao dvobrojevi (4-5, 8-9, 10-11, 12-13, 14-15, 16-17, 18-19, 20-21, 23-24, 37-38 i 49-50), te se može utvrditi da je najobimniji broj časopisa štampan 1967. godine, tj. br. VII sa 656 strana, dok je najmanji broj XXXII iz 1992-1993 godine sa svega 144 strane. Također na osnovu datog pregleda vidljivo je da su dr. Hamdija Kapidžić i dr. Izet Šabotić, kao glavni i odgovorni urednici najduže bili na čelu časopisa, po devet godina, tj. devet objavljenih brojeva.

U nastavku rubrike autori su dali bibliografske podatke o svim objavljenim radovima/prilozima i to redosljedom koji slijedi tematsku strukturu časopisa, dok su bibliografski podaci (kako autori u samoj publikaciji navode – zapisi/referense) navođeni prepoznatljivom sintaksom abecednim redom po prezimenu. Sami bibliografski zapisi sadrže podatke: *redni broj bibliografske jedinice; podatke o autoru/autorima: prezime i ime; naslov, podnaslov rada; naziv časopisa; broj i godinu izdanja; broj stranica; ISSN broj; i eventualno bibliografski značajne napomene*. Autori su napomenuli da u rubrici Prilozi i osvrti nije slijeđena navedena sintaksa navođenja, te da su se u istoj podaci navodili onako kako su bili navođeni na originalnoj građi. Potom su autori u okviru svake rubrike abecedno navodili bibliografske podatke o objavljenim prilozima po rubrikama časopisa: I Arhivistika i arhivska služba – 514 bibliografskih jedinica; II Članci i rasprave – 144 bibliografske jedinice; III Građa – 132 bibliografske jedinice; IV – Prikazi i ocjene – 302 – bibliografske jedinice; V Društvene vijesti – 131 bibliografska jedinica; VI Bibliografija – 12 bibliografskih jedinica; VII Razmjena publikacija – 8 bibliografskih jedinica; VIII In memoriam – 33 bibliografske jedinice; i IX Inventari – 17 bibliografskih jedinica.

Pored navedenih rubrika autori su dali i *Registar autora*, koji je naravno urađen abecedno i pored prezimena i imena autora daje brojnu oznaku

bibliografskih jedinica koju je autor objavio u časopisu *Glasnik*. Registar autora se ne odnosi na brojeve stranica *Bibliografije*, nego na redne brojeve autora radova za *Glasnik*, tj. redni broj bibliografske jedinice pod kojom je autor označen u samoj *Bibliografiji*, čime je pojednostavljeno pretraživanje autora i radova u istoj.

Na samom kraju data je rubrika *Iz recenzija*, u kojoj su date recenzije dr. sc. Senade Dizdar, redovnog profesora na Odsjeku za komparativnu književnost i informacijske nauke i dr. Eli Taubera.

Po svemu rečenom priprema i štampanje publikacije *Bibliografija časopisa Glasnik arhivâ i Arhivističkog udruženja Bosne i Hercegovine (1961-2020)* je opravdana i ima svoju informativnu vrijednost, te će sigurno kao važan alat za istraživanje biti od pomoći za stručne i naučne radnike, studente i istraživače koje traže informacije iz područja arhivistike. Navedena *Bibliografija* daje sve relevantne informacije o autorima radova, naslovima, izdavačima i datumima objavljivanja priloga u 50 brojeva časopisa *Glasnik arhivâ i Arhivističkog udruženja Bosne i Hercegovine*, što omogućava korisnicima da lakše pronađu i citiraju radove.